

AURKIBIDEA

Urtarrilaren 18an, URTEAN ZEHARREKO II. IGANDEA.....	4
Urtarrilaren 25ean, URTEAN ZEHARREKO III. IGANDEA.....	11
Otsailaren 1ean, URTEAN ZEHARREKO IV. IGANDEA	19
Otsailaren 8an, URTEAN ZEHARREKO V. IGANDEA	26
Otsailaren 15ean, URTEAN ZEHARREKO VI. IGANDEA	33

Urtarrilaren 18an
URTEAN ZEHARREKO II. IGANDEA
Haur Misiolarien Jardunaldia

Agurra

Jaunaren grazia eta bakea izan bitez zuekin.

Sarrerako oharpena

Urtean Zeharreko bigarren igandea dugu gaurkoa. Eguberrialdia burututa, bere bizitzako misterioak agertzen dizkigun Jaunaren urratsei jarraitzen diegu. Beharrezkoa dugu bere Hitza eta Eukaristiako Ogia, eguneroko lanean kemenez jarduteko.

«Bat denontzat eta denok beretzat» dio gaur ospatzen dugun Haur Misiolarien jardunaldiko goiburuak. Egun garrantzitsua da, hurrei oroitarazteko, beste haurrentzat misiolari izatera deituak direla, gu guztiok bezala. Izan gaitezen misiolari, gure otoitzarekin eta eskuzabaltasunarekin.

Damu-otoitza

Senideok: aitor ditzagun gure bekatuak, misterio santuak ospatzeko gai izan gaitezen:

—Jesus Jauna, Itun Berriaren bitartekoa: Erruki, Jauna.

—Jesus Jauna, Elizaren Senarra: Kristo, erruki.

—Jesus Jauna, Adam berria, kreazio berriaren lehen-semea: Erruki, Jauna.

Erruki dakigula Jainko guztiz ahaltsua, eta, gure bekatuak barkaturik, eraman gaitzala betiko bizira. ✠. Amen.

Otoitza

Jainko ahalguztidun betierekoa,
zeure ardurapean dituzu zeru-lurrak;
entzun bihotz onez zeure herriaren otoitza
eta eman zeure bakea gure egunotan.
Zure Seme Jesu Kristo gure Jaunaren bitartez,
Zurekin eta Espiritu Santurekin batean
Jainko eta errege bizi baita gizaldi eta gizaldietan. *Rx*. Amen.

Hitzaren liturgiari oharpena

Jainkoak dohaintzat ematen digun salbamina, bizitzari zentzua eta argitasuna emanez gertatzen da. Jesusengan gertatzen da salbamen hori, Bera da sinestedun guztiontzat Jainkoaren agerpena, eta horregatik ezin da inoiz gertatu haserre bide, batasun lokarri baizik.

Lehenengo irakurgaia (Is 49, 3. 5-6)

Isaias Profetaren liburutik

Honela mintzatu zitzaidan Jauna: «Zu zara nire zerbitzaria, Israel, zure bidez agertuko dut neure ospea». Orain honela mintzo da Jauna, amaren sabelean eratu ninduenaren haren zerbitzari izateko, Jakoben leinuak harengana bihurtarazteko eta Israel herria biltzeko. Ohorez jantzi nau Jaunak eta neure Jainkoa izan dut indar.

Jaunak esan dit: «Ez da aski zu nire zerbitzari izatea, Jakoben leinuak berreraikitzeke eta Israelen bizirik geldituak itzularazteke. Nazioen argitatzat ezarriko zaitut, nire salbamina lurraren azken mugaraino irits dadin».

Erantzun-salmoa (*Sal* 40 [39], 2 eta 4ab. 7-8a. 8b-10)

- ✠. Jaunagan nuen jarria itxaropen **guzt**tia,
makurtu eta entzun du nire **oi**hua.
Kantu berria ipini dit **ez**painetan,
gorespen-kanta gure Jain**ko**arentzat. ✠.
- ✠. Zuk ez duzu sakrifiziorik eta eskaintzarik **nahi** izan,
ez erre-oparirik eta bekatuen barkamen-oparirik **es**katu;
baina belarriak ireki **diz**kidazu.
Horregatik diot: «**H**emen nauzu». ✠.
- ✠. Hau dago nitaz liburuan **i****dat**zia:
egin deza**da**la zure **nahi**a.
Atsegin dut, **e**ne Jainko,
barne-muinetan dut zure **le**gea. ✠.
- ✠. Iragarri dut batzar nagusian zure **justi**tia,
ez ditut ezbainak itxi, ongi da**ki**zu, Jauna. ✠.

Bigarren irakurgaia (*1 Ko* 1, 1-3)

San Paulo Apostoluak Korintoarrei egindako
lehenengo gutunaren hasiera

Nik, Paulok, Jainkoak hala nahirik eta berak deiturik, Jesu Kristoren apostolu naizen honek, eta Sostenes anaiak, Korinton dagoen Jainkoaren eliz elkarteari idazten diogu.

Jesu Kristok sagaratu zaituzte eta Jainkoak bere herri santu izateko deitu, edozein lekutan Jesu Kristo gure Jaunari dei egiten dioten guztiekin batera, hauek eta guk Jaun bat bera onartzen baitugu. Grazia zuei eta bakea gure Aita Jainkoagandik eta Jesu Kristo Jaunagandik.

Aleluia (Jn 1, 14a. 12a)



℣. Hitza haragi egin zen,
eta gure artean jarri zuen bizilekua.
Onartu zuten guztiei
Jainkoaren seme-alaba izateko ahalmena eman zien. ℟.

Ebanjelioa (Jn 1, 29-34)

Homiliarako argibideak

0.- BERRI ONA

- Eguberriko festak itxuraz atzean utzi berri ditugu, baina egun horietan ospatu dugunak gudan irauten du urte osoan. Jauna gugana etorri bada, ez da festarako bakarrik etorri. Onean eta txarrean gurekin egongo da: Emmanuel gurekin da.

- Eta hauxe da gure Berri Ona. Ez da Jesusek esan eta egindakoak bakarrik gure berri on horren oinarri. Bera da, Jauna dugu gure Berri On.
- Aurreko igandean Jaunaren Bataioak eginkizun, misio baten hasiera markatzen bazuen bere ibilbidean, gaurko galdera hauxe izan daiteke: non dago nire bataioa? Non dago bataioko sakramentuan jaso nuen txinparta hura!
- Samina sentitzen dugu kristau elkartean bataioa jaso zuten hainbatek hasierako urrats hura albora utzi dutela. Fedea zama bezala bizi zuten, ez zion Jesusen iragarritako Berri On horrek ezer eskaintzen bere eguneroko bizitzarako.
- Eta hortxe dago gaurko Bataiatzaileak eskaintzen digun “munduko pekatua kentzen duena”, gure zamak eta ezinak arintzen dituen, gure zauriak sendatu eta askapena bidean jartzen gaituena.
- Ez dago fededunik Jaunak askatu gaituela, salbatuko gaituela eta oraintxe salbatzen gaituela sinestu eta barneratzen ez badugu.

1.- ESPIRITUA BEHAR DUGU

- Ez da, beraz nahikoa, bataioko urak azaletik zipriztindu bazaitu. Beste txinparta bat behar da, lehen urratsa finkatuko duena, besteek gure ordeztatuak auzeratutako pausoa tinkotuko duena.
- Nirea da urratsa, nirea aukeraketa. Jaunarena bultzada, bere Espiritu Santua, bere sua.
- Su hori pizteko kristau elkartean txinparta behar da, isilean lantzen den barne otoitza, Jaunak errespetuz erakusten digun bidea ikusteko eta bereizteko ahalegin etengabea.

- Espiritua behar dugu hasierako urrats hori finkatu dadin. Espiritu Santua da guretzat bizien bizigarri, poz emaille bikaina, malkoetan pozgarri.

2.- JESU KRISTOK SAGARATU GAITU

- Jauna beti joko du gure bihotzeko atea. Jainko Guztiz Ahaltzuak ez du presarik, beti izango dugu zain.
- Baina, kristau elkartearen izatea Jesu Kristoren lekuko izatea da nonahi eta noiznahi. Argi eta garbi esateko: gure eginkizuna Jainko Jaunaren maitasuna egungo gizon emakumeei modu egokia aurkeztu eta barnetik bizitzea izango da gure eginkizuna, gure misioa. Horretarako dago Eliza, kristau elkartea.
- Korintoko elkarteari San Paulok hauspoa ematen zion horixe gogoratu: Jesu Kristok sagaratu bagaitu, gure misioa betetzeko gai izan behar dugu. Ahalegina gurea da, baina bultzada, txinparta, hauspoa Jaunarena.
- Jendea, egungo gizon-emakumeak Jaunarengana erakartzeko geu izan behar dugu lehenbizi aurkezten dugunaren testigu. Guk geuk bizi behar dugun barnetik kanpora Jaunaren lekuko izan gaitzen, bizi garen tokian gatz eta argi izan gaitzen.
- Baina, horretarako Bataiatzailearen antzera Jesusen urrats apal eta isila ikusteko gai izan behar dugu. Jauna talde handiko bataio batean bataiatua izan zen, ez zuen erreportaje eta argazkilariaren beharrik izan. Gurea Berri Onaren iragarle izatea da, zintzo, lasai eta egiaz, Jaunaren antzera.

Jainkoaren herriaren otoitza

Senideok egiogun otoitz Jaunari, eta eska diezaiozun entzun ditzala errukiz gure otoitzak:

- Elizaren alde, bakean eta batasunean biziz, Jainkoaren ezaugarri izan dadila mundu zabalean. Eska diezaiogun Jaunari.
- Gure herriko eta herrialde guztietako agintarien alde, Jainko gure Jaunak argi ditzala haien pentsamenduak, egiazko bakeranzko erabakiak har ditzaten beti. Eska diezaiogun Jaunari.
- Bihotz-berritze bidean direnen alde eta bataioa hartzeko prestatzen direnen alde, Jainkoak bere errukiaren ateak zabal diezazkiela eta Kristoren bizi berrian parte eman diezaiela. Eska diezaiogun Jaunari.
- Lurralde guztietako haurren alde: Jesusen berri ona aurkitzeko zoria izan dezatela, aurkituta leial bizi daitezela, eta leial izanik Haren lagun eta testigu ager daitezela guztiontzat. Eska diezaiogun Jaunari.
- Hemen gurekin ez dauden etxeko eta adiskideen alde, Jainkoak entzun ditzala haien otoitzak ere eta bere asmoetan lagun diezaiela. Eska diezaiogun Jaunari.

Jainko ahalguztiduna, Kristo, herri guztien argia den pazko-bildotsaren bidez, gizaki guztiak itun berriaren herria osatzera deitzen dituzu; entzun gure otoitzak eta sendotu gugan Zure Espirituaren indarrez bataioaren grazia, gure bizitzak Ebanjelioaren poza adierazi dezan. Jesu Kristo gure Jaunaren bitartez. *℟*. Amen.

Oparigaien gaineko otoitza

Egizu, Jauna, parte har dezagula sarri sakramentu honetan, gure erospena gertaberritzen baita Jaunaren opariaren oroigarri hau ospatzen dugun bakoitzean. Jesu Kristo gure Jaunaren bitartez. *℟*. Amen.

Jaunartze ondorengo otoitza

Isur iezaguzu, Jauna, zeure maitasun-espirtua,
zeruko ogi bat beraz janaritu gaituzunok
zeure maitasunean bat egin gaitzazun.
Jesu Kristo gure Jaunaren bitartez. ✠. Amen.

Urtarrilaren 25ean
URTEAN ZEHARREKO III. IGANDEA

Agurra

Berri on eta pozbide dugun Jesus Jauna izan bedi zuekin.

Sarrerako oharpena

Ongi etorri, senide maiteok, Jaunak igandero eskaintzen digun otordu santura. Kristo Piztuak, gizon egin den hitzak, gure bizitzak argitzen dituela gogoraraziz eta bere izenean biltzen garenon artean beti presente dagoela kontuan izan dezagun. Bidera ateratzen zaigu; bere Hitzak sutu ditzala gure bihotzak eta bultza gaitzala Jainkoaren maitasunaren berri on eta pozgarria iragartzera.

Damu-otoitza

Bekatari garela aitortuz, eska diezaiogun barkamena Jainko errukitsuari konfiantza osoz.

—Jesus Jauna, behartsuei Berri Ona ematera bidalia: erruki, Jauna.

—Jesus Jauna, zure Espiritua beti gugan indartsu iraunarazten duzuna: Kristo, erruki.

—Jesus Jauna, besteen behar larrien aurrean erne bizitzen erakusten diguzuna: Erruki, Jauna.

Erruki dakigula Jainko guztiz ahaltsua, eta, gure bekatuak barkaturik, eraman gaitzala betiko bizira. *℟̃.* Amen.

Otoitza

Jainko ahalguztidun betierekoa,
zuzendu zeure gogara gure jarduera,

zure Seme maitearen izenean fruitu on ugari eman dezagun.
Zurekin eta Espiritu Santuarekin batean
Jainko eta errege bizi baita gizaldi eta gizaldietan. *R̃*. Amen.

Hitzaren liturgiari oharpena

Jainkoak dohaintzat ematen digun salbamena, bizitzari zentzua eta argitasuna emanez gertatzen da. Jesusengan gertatzen da salbamen hori, Bera da sinestedun guztiontzat Jainkoaren agerpena, eta horregatik ezin da inoiz gertatu haserre bide, batasun lokarri baizik.

Lehenengo irakurgaia (*Is* 8, 23b–9, 3)

Isaias Profetaren liburutik

Garai batean, lotsagarri utzi zituen Jaunak Zabulonen lurraldea eta Neftaliren lurraldea; azken aldian, ordea, ospetsu egin du itsaso ondoko bidea, Jordanez bestaldeko lurraldea, Galilea, jentilen eskualdea. Ilunpean zebilen herriak argi handia ikusi zuen; herio-itzalean bizi zirenei distira egin zien argiak. Gehitu zenuen poza eta handitu atsegina; pozik dabiltza zure aurrean, uzta biltzean izaten den pozez, harrapakinak banatzean izaten den atseginez. Apurtu baituzu lepoan zeramaten uztarri astuna, zapaltzailearen aginte-makila, Madiango gudarostea apurtu zenuen bezalaxe..

Erantzun-salmoa (*Sal* 26, 1. 4. 13-14)





Ÿ. Jauna dut argi eta salbamen,
nork ni beldurtu?
Jauna biziaren babes,
nork ni izutu? R̃.

Ÿ. Gauza bat eskatzen diot Jaunari, '
horren bila nabil ni:
bizi nadila Jaunaren etxean '
neure bizitzako egun guztietan,
Jaunaren edertasuna miretsiz
eta haren tenplua zainduz. R̃.

Ÿ. Ziur dakit Jaunaren ontasuna gozatuko dudala '
bizidunen lurrean.
Itxaron Jaunagan!
Eutsi gogor, izan bihotz!
Itxaron Jaunagan! R̃.

Bigarren irakurgaia (1 Ko 1, 10-13. 17)

San Paulo Apostoluak Korintoarrei egindako lehenengo gutunetik

Senideok, Jesu Kristo gure Jaunaren izenean arren eskatzen dizuet:
etor zaitezte denok bat elkarrekin eta ez bedi izan zatiketarik zuen
artean; bizi elkar ondo harturik, ikuspegi eta iritzi bat bera duzuela.

Izan ere, ene senideok, Kloeren jendeagandik jakin dut
eztabaidak dituzuela zeuen artean; alegia, hor ari omen zarete nor
bere aldetik esaten: «Ni Paulorena naiz», «ni Apolorena»; «ni
Pedrorena», «ni Kristorena».

Zatitua al dago, bada, Kristo? Paulo gurutziltzatu ote zuten
zuengatik? Edota Pauloren izenean bataiatu ote zintuzteten?

Aleluia (lk. Mt 4, 23)



ᄎ. Erreinuari buruzko Berri Ona hots egiten zuen **lesusek** eta herrian gaitz guztiak sendat**zen** zituen. ᄎ.

Ebanjelioa (Mt 4, 12-23)

Homiliarako argibideak

0.- BIHOTZ-BERRI ZAITEZTE

- Jesusek bere ministerio publikoa hasten da Juanen atxilotetaren gertaera tragikoaren ondoren. Erreinuaren iragarpena atxilotuta dagoen bidegabekeriak pizten du Jesusengan.
- Espetxeratuen egoera da oraindik kristau elkartearentzat bere misioaren pizgarria, injustizia guztiak dira gure eginkizunaren aldaba, gure erosotasunetik irten eta laguntzeko prest jartzen garenean, Jainkoak hori nahi ez duela salatzen gai bagara, noski.
- Baina, zenbaitetan Berri On horren poxpoloa itzali egiten dugu. Gure lasaitasuna desorekatuko duen aldarririk egitea ez da komeni izaten. Horregatik, onartu dezagun, Jesusen Ebanjelioa deserosoa da, ez da beti ezitia izaten.

- Jesusen Berri Onak deseroso sentiarazten badigu oraindik bihotz-berri beharrea gaudenaren seinale da. Goitik hasita behar denok aldatu behar dugu, bihotz-berritu, jarrerak aldatu, gure iparrorratza Jaunaren bidera jarri.

1.- ZATOZTE NIREKIN

- Jesusek Erreinuaren lehen urratsa emateko ez du Jerusalem aukeratu, juduen logikak pentsa zezakeen modura, juduen erlijioaren bihotzean. Ez, Kafarnaumen jarri zen bizitzen Tiberiades itsasbazterrean.
- Hor ere Jaunak ezustekoa ematen du. Belenen jaio zen galilearra, Kafarnaumen jarri zuen bizilekua eta han hasi bere Erreinuko aldarria.
- Nazaretarrak bere herria utzi eta Neftali eta Zabulonon lurraldean jarri zen bizitzen. Jesusek hiriko periferiak aukeratu zituen Berri Onaren lehen eginkizunean hasteko.
- Askok erlijioaren ertz horietan aurkitzen dira Ebanjelioaren freskotasunaren zain. Orain arte bizi edo entzun dutenak ez ditu askatu, aspertu baizik. Ez du euren bihotza ukitu, ez dute Jesusen aldarriaren zirrara sentitu.
- Kristau elkartean ertzi horietan ibili behar du lanean beldurrik gabe. Ez gara orain irabaziei begira hasiko. Apalago lan egin behar dugu, gaudenok zaindu tentuz eta ertz horietan lanean aritu. Hortxe, ustekabea, topo egin zuen Jesusek Simon eta Andresekin. Halako izango zen indarra Jesusen “zatozte” horrek arrantzaleen lana utzi eta ebanjelioaren abentura harrigarrian sartu zituela.

2.- BERRI ONA HOTS EGIN

- Era berrietako hainbat talde txikietan konbertsio berriak bat batean gertatzen direla esaten digute pastoralgile batzuk. Egiten zeudena utzi eta ustekabeen Jesusen Berri Ona aurkitzen omen dute eta Jaunaren aurrean sagraioan jartzen direla otoitzean.
- Baina, bihotz berritzeak sagraioaz gain dauden senideengana eraman behar gaitu. Hortxe dago koxka, hortxe gure bihotz berritzearen egiazko froga: aulkiz aldatu naiz edo behartsuengana eraman nau bihotz berritze honek? Bakarrik dagoen gaixoren bat bisitatu al dut aspaldi honetan edota miresgarri egiten zaidan sagraioari begira jarraitzen dut?
- Berri Ona hots egitea senideengana narama, bereziki, pobreengana, Jesus Jauna gaur joango litzatekeen toki berberera. Bihotz berritzea pozez betetzen gaituen gertakizun ederra da, eguneroko bizitza xume eta barnetik aldatzen duen gertaera. Inoiz ez da berandu goitik behera bizitza aldatzeko, Jaunak gure bizitzako erabakiak zuzendu ditzala. Zerueta erreinua hurbildu nahi badugu martxan jarri beharko dugu eta gaur bertantxe Jesusen Berri Ona hots egiten hasi.

Jainkoaren herriaren otoitza

Egiogun otoitz senideok, Jainko Aita errukiorrari, bere eskuetan baikaude, eta eska diezaigun uste onez entzun ditzala bere herriaren otoitzak:

—Jainkoaren Elizaren alde: egunez egun lehia handiagoaz bila dezala bere Jaunaren aurpegia eta bere kide guztiak saia daitezela bihotz berriz bizitzen. Eska diezaigun Jaunari.

- Nazio guztietako arduradunen alde: gogoz eta kemenez lan egin dezatela guztiontzat bakea eta ongizatea bilatuz, denongan bakea eta justizia nagusitu daitezen. Eska diezaiogun Jaunari.
- Elizan Jainkoaren Hitza iragartzeko ardura duten guztien alde: irakasle, artzain, katekista eta kristau guztiok gaurkotu dezagula Jainkoaren Hitza, entzule guztien bizitzarako argi izan dadin. Eska diezaiogun Jaunari.
- Hemen bilduak gauden guztion alde: Jainkoak fedean sendo irauteko eta elkarren maitasunean hazteko grazia eman diezagula. Eska diezaiogun Jaunari.

Jainko Jauna, apostoluen fedean oinarritu duzu Zure Eliza; entzun gure otoitzak eta egizu Zure hitzak argiturik eta goi-maitasunaren batasunak eraginda, salbamen- eta itxaropen-ezaugarri izan gaitzela ilunpean bizi diren guztientzat. Jesu Kristo gure Jaunaren bitartez. *℟*. Amen.

Oparigaien gaineko otoitza

Begira, Jauna, begi onez gure eskaintzari,
eta sagara ezazu zeure Espirituaren indarrez,
guretzat salbamen-sakramentu gerta dadin.
Jesu Kristo gure Jaunaren bitartez. *℟*. Amen.

Jaunartze-ondorengo otoitza

Jainko ahalguztiduna,
bizi berriaren grazia eman diguzu;
egizu, bizi berri honek beti poztu gaitzala.
Jesu Kristo gure Jaunaren bitartez. *℟*. Amen.

Otsailaren 1ean
URTEAN ZEHARREKO IV. IGANDEA

Agurra

Jauna zuekin.

Sarrerako oharpena

Gutako bakoitza, Jaunak aukeratuak garelako oroitarazten digu igandeko batzarrak. Eukaristian berritzen dugu bokazio hori eta suspertzen da gure fedea, itxaropena eta maitasuna. Kristoren adiskide izateak laguntzen digu, biziaren sakramentuan parte hartuz, gure dohainak, sendotasunez partekatzen.

Damu-otoitza

Kristok bekatuaren eta heriotzaren gain lortu duen garaipena ospatzen dugu igandean. Aitor dezagun zeruetako Aitaren errukiaren beharrean garelako, bekaturako hilik bizi berrira piztu gaitezen.

—Jesus Jauna, egiaren eta graziaren betea zarena: erruki, Jauna.

—Jesus Jauna, gu aberasteko zeure burua behartsu egin duzuna: Kristo, erruki.

—Jesus Jauna, gurekin zeure herri santua egitera etorri zarena: Erruki, Jauna.

Erruki dakigula Jainko guztiz ahaltsua, eta, gure bekatuak barkaturik, eraman gaitzala betiko bizira. *℟*. Amen.

Otoitza

Jainko gure Jauna,
egizu, gur zaitzagula bihotz-bihotzez
eta maita ditzagula gizon-emakume guztiak egiazko maitasunez.

Zure Seme Jesu Kristo gure Jaunaren bitartez,
Zurekin eta Espiritu Santuarekin batean
Jainko eta Errege bizi baita gizaldi eta gizaldietan. *R.* Amen.

Hitzaren liturgiari oharpena

Beti egon izan dira profetak, munduko gertakarietan txarra salatu eta Jainkoaren arrastoak bereizten dituztenak. Sasiprofetak edo gezurrezko profetak ere ez dira falta, engainatzen gaituztenak. Jesusengandik jaso dugu itxaropena sortzeko gai den hitza. Entzun dezagun!

Lehenengo irakurgaia (*So* 2, 3; 3, 12-13)

Sofoniasen Profezia liburutik


Bila ezazue Jauna, zuek, lurraldeko apalok, haren aginduak betetzen dituzuenok; bila ezazue zuzentasuna, bilatu apaltasuna. Eta beharbada aurkituko duzue babes a Jaunaren haserre-egunean. «Herri apala eta behartsua utziko dut Nik zurean; Jaunaren izena izango dute babes Israelen bizirik geldituek.

Ez dute bidegabekeriarik egingo, ezta ere gezurrik esango; haien ahoan ez da mingain maltzurrik aurkituko; inork izutu gabe larratuko dira eta etzango».

Erantzun-salmoa (*Sal* 146 [145], 6c-7. 8-9a. 9b-10)



Bai do-ha - tsu, Jau - nak be-re oi-nor - de hau-ta -
tu du - en he- rri - a.



- ✠. Betiko eusten dio Jaunak bere leialtasunari.
 Zapalduen eskubideak defendatzen ditu,
 gose direnei ogia ematen.
 Jaunak askatzen ditu presoak. ✠.
- ✠. Jaunak zabaltzen ditu itsuen begiak,
 Jaunak altxatzen konkortuak,
 Jaunak maitatzen zintzoak,
 Jaunak ditu etorkinak zaintzen. ✠.
- ✠. Umezurtzei eta alargunei zutik die eusten,
 baina gaiztoen nagusigoa iraultzen.
 Jauna errege da betieran,
 zure Jainkoa, Sion, errege menderen mendetan! ✠.

Bigarren irakurgaia (1 Ko 1, 26-31)

San Paulo Apostoluak Korintoarrei egindako lehenengo gutunetik

Senideok: Begira zein zareten Jainkoak deituak; zuen artean ez dira asko munduak jakintsutzat hartzen dituenetakoak, ezta ahaltsu nahiz handiketakoak ere. Aitzitik, munduak zorotzat duena aukeratu du Jainkoak, jakitsuak lotsarazteko, eta munduak ahultzat duena, indartsuak lotsarazteko; munduak baliogabetzat eta mespretxagarritzat duena aukeratu du Jainkoak, munduaren begietan ezerez dena, zerbait direla uste dutenak ezerezteko; horrela, ez du inork Jainkoaren aurrean harrotzerik.

Berari zor diozue izatea Kristo Jesusengan, hau egin baitu Jainkoak guretzat jakinduria, honen bidez askatu gaitu, salbatu eta santu egin. Horrela betetzen da Liburu Santuak dioena: «Harrotu nahi duena, harro bedi Jaunagan».

Aleluia (Mt 5, 12a)

℣. Poztu zaitezte eta alaitu,
handia izango baita zuen saria zeruetan. ℟.

Ebanjelioa (Mt 5, 1-12a)**Homiliarako argibideak****0.- MENDIRA IGO ZEN**

- Jesusek ez zuen pulpiturik behar izan esan behar zuena argi eta garbi esateko. Jesusek aldarrikatutako zoriontasunak mendira igo eta handik hasi zen hizketan.
- Hitz horiek askatzaileak izan ziren entzule haientzat, hitz horiek dira oraindik iraultzaileak Jesusen jarraitzaileontzat. Eta, hala ez badira, ez gara ari leialtasunez jokutzen ari, ez dugu fin jokatu gure maisuak esandakoarekin.
- Zerbait argi badago Jainkoa behartsuen alde ateratzen dela beti, alargunak eta umezurtzak ez dituela bakarrik uzten, sufritzen ari dena ez duela inoiz ahazten.
- Mendiko aldarria goitik behera egin den oihua da, Goiko Jaunak beheran gaudenon sufrimendua albo batera utzi ez duela gogorarazteko.

1.- ZORIONEKOAK

- Inork ez du zorionekoak deitzeko balorerik izan barnetik gauzak aldatu nahi dituenak baizik. Nazareteko Jesusek goitik behera gauzak aldatzeko tresnak eman zizkigun eta gu gara, egungo kristau elkarteak gara iraultza hori eusten duena.
- Eta norbaitek pobreen egoera eusteko aitzakiarekin egoera horri eusten badio, Jaunaren izenean bederen, ez du Jesusen hitzari leial erantzuten. Hare gehiago, Jesusen asmoa justu kontrakoa zen: zoriontasunak gizarteak alboratu zituen gizon-emakumeei zuzendutako hitzak dira. Baina ez egoera horrek iraun dezan eta guk bedeinka dezagun usteko ebanjelioaren izenean.
- Egoera horretan Jainkoak behartsuak, negarrez daudenak, apalak eta atsekabetuak gogoan ditu. Ez ditu ahaztu. Gizarteak, bere eguneroko abiaduran, alboratu baditu ere, Jaunak gogoan ditu eta, egoera zuzengabe horretatik ateratzeko bultzada ematen die.
- Eta, itxuraz ondo gaudenoi, egoera horrek bere horretan ezin duela jarraitu gogoraziko digu.

2.- POZTU ETA ALAITU

- Lasai eta eroso dagoenak ez du ulertuko zoriontasunen mezua, ez du entendituko zertan alaitu eta poztu behar duen ondo badago, ezer aldatzeko premiarik ez badago.
- Nazareteko Jesusek ezik historian zehar inork ez die zorionekoak deitu behartsuei. Halako tinkotasunez adieraziko du hori hitzez eta egitez ere egingo duela. Gurutzea izango da horren testigu krudela. Askorentzat bada Jesus, horien artean behartsuak daude. Denontzat bada Jesus, behartsu egin beharko dugu gogoz.

- Zoriontasunak Mesiasak dakarkigun denbora berrien Berri Ona da. Eta berri on horrek eragina izan dezan desoreka hautsi egin behar da, asko duenak banatu gutxiengoen artean, Jaunaren giza oreka, justiziaren harmonia iritsi dadin.
- Jesusek ez zituen zoriontasunak aldarrikatu bakarrik. Berak bizi egin zituen eta muturreraino eraman, gure alde eman zuen bizia. Bera izan zen behartsuen artean behartsu, bera izan zen apala, bera zuzentasunaren gose eta errukitsu. Bakegile eta zuzentasunagatik erasotua.
- Bai dagoela desberdintasuna esan eta egitearekin. Zoriontasunak ez dira koadro batean zintzilik edukitzeko asmo ederrak. Esandakoa egia bihur dadin gizon-emakumeak behar dira gaur zoriontasunen bidea urratzeko prest, Jesusek hasitako bidearen testigu berriak, justiziaren eta maitasunaren Erreinuan murgildu nahi badugu, behintzat.

Jainkoaren herriaren otoitza

Senideok, dei egin diezaiogun bihotz batez on guztiaren iturri den Jainko Aitari:

- Hemen Jaunaren izenean bildua eta mundu osoan zabaldua dagoen Elizaren alde. Eska diezaiogun Jaunari.
- Gure herriaren alde, ongizatean eta bakean aurrerapausoak eman ditzan. Eska diezaiogun Jaunari.
- Bidean direnen alde, gaixoen, kartzelatuen, behartsuen eta sufritzen duten guztien alde. Eska diezaiogun Jaunari.
- Gure senide hildakoen alde, Jaunak bere argizko eta zorionezko erreinuan sar ditzan. Eska diezaiogun Jaunari.

Jainko Jauna, behartsu eta apalei Zure betiereko erreinuko zoriona agindu diezu; entzun gure otoitzak eta egizu Zure fededunek ez dezatela munduko tentaldien aurrean etsi, baizik eta Ebanjelioko apalek bezala, leial jarrai diezaiotela bere Senar eta Jaunari, era honetan Espirituaren eragina dastatuz. Jesu Kristo gure Jaunaren bitartez. *Rx*. Amen.

Oparigaien gaineko otoitza

Hona hemen, Jauna,
aldare gainean zure zerbitzarion eskaintza;
har ezazu bihotz onez
eta egizu guretzat sakramentu salbagarri.
Jesu Kristo gure Jaunaren bitartez. *Rx*. Amen.

Jaunartze ondorengo otoitza

Indarberritu egin gaituzu, Jauna,
gure erospeneke sakramentuaren bidez;
egizu, betiereko salbamenaren janari honi esker,
egin dezagula beti aurrera egiazko fedean.
Jesu Kristo gure Jaunaren bitartez. *Rx*. Amen.

Otsailaren 8an **URTEAN ZEHARREKO V. IGANDEA**

Agurra

Berari jarraitzera deitu gaituen Jesu Kristoren Espiritu santutzailea izan bedi zuekin.

Sarrerako oharpena

Gaur, indarkeria desagerraraztera eta bakearen dohaina jasotzera animatzen gaituzte. Bakea da bihotzaren irrika sakona, baina, batez ere, bakea da gure bizitzan eta komunitateetan landu nahi dugun Jaungoikoaren dohaina.

Baina bakeaz hitz egiteak garapen justu, inklusibo eta jasangarria eraikitzea ere esan nahi du. Besteak beste, gosea eta pobrezia, nahitaezko emigrazioa, esplotazioa, abandonuak hautsitako haurtzaroa eta indarkeria desagerrarazi behar dira bakearen bidez.

Bake-tresna izatera deituak gara, eta horrek esan nahi du justizia, adiskidetzea eta maitasuna sustatu behar ditugula gure bizitzetan..

Damu-otoitza

Presta gaitezen bekatari garela aitortuz:

—Jesus Jauna, bekatarien artean Santua zarena: erruki, Jauna.

—Jesus Jauna, Aita agertzen digun Jainkoaren Semea: Kristo, erruki.

—Jesus Jauna, jarraitzaile egiten gaituen Maisua: Erruki, Jauna.

Erruki dakigula Jainko guztiz ahaltsua, eta, gure bekatuak barkaturik, eraman gaitzala betiko bizira. *℟.* Amen.

Otoitza

Zaindu familia hau, Jauna, zeure betiko maitasunez;
eta gure esperantzaren oinarri bakarra
zure grazia zerutarra denez gero,
har gaitzazu beti zeure babespean.
Zure Seme Jesu Kristo gure Jaunaren bitartez,
Zurekin eta Espiritu Santuarekin batean
Jainko eta Errege bizi baita gizaldi eta gizaldietan. ✠. Amen.

Hitzaren liturgiari oharpena

Zuloak dituen etxea berotzea alferrikakoa da; fedeari eusten bakarrik saiatzen den ebanjelizatzea benetakoa ez den bezala. Kristauak, argia izan behar du ilunean dagoenarentzat, ez momentu bateko iluna argitzeko, bestearengan ere argia sortzeko eta bestea ere fedez betetzeko baizik.

Lehenengo irakurgaia (Is 58, 7-10)

Isaias Profetaren liburutik

Honela mintzo da Jauna: «Eman zeure ogitik gose denari eta hartu etxean aterperik gabeko behartsuak; jantzi biluzik dagoena, eta ez egin entzungor zeure gizakideari. Orduan zure argia egunsentia bezala zabalduko da eta zure osasuna berehala erneko; justizia izango duzu aurretik gidari eta Jaunaren aintza atzetik babesgarri. Orduan zuk dei egin, eta Jaunak erantzungo dizu; zuk oihi egin, eta hark esango: “Hemen nauzu!”

Uztarri oro, salaketak eta gaizki esateak baztertzen badituzu, gose denari zeure ogitik ematen eta behartsuaren premia asetzen baduzu, zure argia ilunpean zabalduko da eta zure ilunaldia eguerdi bihurtuko».

Erantzun-salmoa (*Sal* 112 [111], 4-5. 6-7. 8a eta 9)

- ✠ Ilunpean argia bezala da zuzenentzat:
errukiorra, bihozbera eta zintzoa.
Ongi doakio errukitu eta ematen duenari,
bere arazoak zuzen atontzen dituenari. ✠
- ✠ Ez da inoiz koloka egongo;
zintzoaren oroitzapenak beti bizirik du iraungo.
Ez die berri txarrei beldurrik,
sendotu du bihotza, Jaunaz fidaturik. ✠
- ✠ Seguru du bihotza, beldurrik gabe;
esku betean ematen die behartsuei,
haren eskuzabaltasunak betiko dirau,
ohorez jasoko du bekokia. ✠

Bigarren irakurgaia (1 Ko 2, 1-5)

San Paulo Apostoluak Korintoarrei egindako lehenengo gutunetik

Senideok: Niri dagokidanez, Jainkoaren salbamen-asmoa iragartzera joan nintzaizuenean, ez nizuen hitz egin giza jakinduriatzko hizkera landua erabiliz. Izan ere, zuen artean ez nuen ezer jakin nahi izan, Jesu Kristo, eta berau gurutziltzatua, izan ezik.

Horregatik, ahul eta beldurrez dar-dar agertu nintzen zuen aurrean. Nire hitza eta predikua ez ziren giza jakinduriatzko

argudiotan oinarritu, Espirituaren indarrean baizik, horrela, zuen sinesmena Jainkoaren indarrean oinarritu zedin, eta ez giza jakindurian.

Aleluia (*Jn 8, 12b. d*)



℣. Ni naiz munduaren argia, dio **Jaunak**;
Niri jarraitzen didanak izango du bizirako **argia**. ℟.

Ebanjelioa (*Mt 5, 13-16*)

Homiliarako argibideak

0.- LURRAREN GATZA

- Jesusek mendi gainean iragarritako zoriontasunen ikasleak bagara gaur bi tresna eskaintzen dizkigu eginkizun luze hori aurrera eramateko: lurraren gatza izateko deia egiten digu gaur Jesusek, munduaren argia garela gogorazten digu.
- Jesusen mezua, aholkua, agindua egia bihurtu nahi badugu argi eta gatz horren eragile, suspertzaile izan behar dugu.
- Bataiotik jaso dugu eginkizun hori. Ez da inor bestea baino gehiago, bataioa jaso genuenok berdinak gara eginkizun hori bultzatzeko.
- Gatza da janariari grazia ematen diona. Badirudi zenbaitetan ebanjelioko graziaren dieta egiten ari garela, ez dela

ebanjelioak ematen digun grazia hori inondik inora ageria. Zorrotz jarritz gero, galdera zuzena hauxe litzateke zuretzat eta niretzat: non geratu da bataiotik jaso genuen gatz hura?

- Kanpotik ikusten gaituztenek aurpegiratzen digute hitzez adierazten duguna badirudiela barnetik ez dugula bizi, itxuraz behintzat. Badirudi gure ospakizunak, gure testigantza, gure misiolari txinparta moteldu egin zaigula, gatz gatzatu egin zaigula.

1.- MUNDUAREN ARGIA

- Gaurko bigarren proposamena zentzuzkoa da benetan: ez dugu kriseilua pizten lakaripean jartzeko. Ziurrenik, gaurko gazteek ez dute jakingo zer den kriseilua. Hare gutxiago lakaria zer den. Bigarrena baserritarrek erabiltzen zuten neurria zen, sistema metriko hamartarra orokortu zen arte.
- Kriseiluak ilunpetan argi egiten zuen argitxo xumea zen. Apala bai, baina eraginkorra.
- Ba, lurraren gatz izateko deiak mundu honek hain premiazkoa duen Jainkoaren grazia eragiteko dei larria bada, munduaren argia izateko deia ere hortxe dago kristauon eginkizun larrien artean.
- Ez gara gu mundu honetako gatz eta argi bakarrak, garai batean uste genuen moduan. Egungo gizarte honetan gure hazitxoak jartzea tokatzen zaigu apaltasunez, ez baikara mundu honi grazia eta argia jar diezaiokeen bakarrak. Ez gara bakarrak, baina hori gure eginkizun misiolarien artean dago.
- Mundu honetako gorabeherak argibide bat behar dute eta gu sinestuta gaude Jesusen Berri Onak on handia egin dezakeela, Jesusen zoriontasunek gizarteari ekarpen handia egingo

liokeela. 21. mende honetan, azpiegitura teknologikoak eskura izan arren, aurrerapen handi eta harrigarrien aurrean egon arren, Ebanjelioak eskaintzen duen errukia, hurbiltasuna, gizatasuna, elkartasuna eta itxaropena behar dugu.

2.- AITA GORETS DEZAGUN

- Ez dago zeruko Aita goresteke gauza hoberik bataiotik hartu genuen konpromisoari heldutasunez heldzea baino!
- Ez gara leloak, hasierako graziaren gatzak galdu genuen gizon emakumeak. Ez dugu jasotako argi izpia lakaripean gorde.
- Kaskarkeriatik ateratzeko adorea behar dugu eta indar hori Jesusen Espirituak eman diezaguke. Zenbaitetan bultzada hori behar dugu, fedearen lasterketaren gailurra burutzeko bultzada.
- Ondo bagaude, etxeko lanak fundamentuz egiten baditugu, gauden tokian gatzak eta pipermina jartzen badugu, iluntasuna nagusitzen lekuetan argia jartzeko gogoak erakusten badugu... Aita, zeruko Aita goretsiko dugu eta gizakiak bere oinarritzko bokazioa aurkituko du. Burua altxa dezagun, izan gaitezen lurraren gatzak eta munduaren argia. Harrokeriarik gabe, garena onartuz eta eskainiz.

Jainkoaren herriaren otoitza

Egiogun otoitz senideok Aitari, betiereko Jainkoaren Semeari eta on guztiaren iturria den Espirituari:

—Munduan zabaldurik dagoen egiazko Jainkoaren elizarentzat, eska dezagun Jainko-maitasun egiazkoa. Eska diezaiogun Jaunari.

- Herrietako agintarientzat eta gizakien bizimodua euren eskuetan dutenentzat eska dezagun zuzentasun espiritua eta herritarrak zerbitzatzeko lehia. Eska diezaiogun Jaunari.
- Zapalduak diren ahulentzat eta pertsegituak diren zuzenentzat eska diezaiogun Jesus Salbatzaileari. Eska diezaiogun Jaunari.
- Geuretzat eska diezaiogun Jaunari seme-alabatzako begirunea, maitasun leiala eta bititza zoriontsua. Eska diezaiogun Jaunari.

Jainko Jauna gurutzearen ezin-ulertuan agertu duzu Zure jakinduria munduko zuhurtziaren gainetik dagoela; entzun gure otoitzak eta egizu barnera gaitezela Ebanjelioaren egiazko espirituan, fedean gartsu eta maitasunean indartsu izanik munduaren argi eta lurraren gatz izan gaitezen. Jesu Kristo gure Jaunaren bitartez. *Rx*. Amen.

Oparigaien gaineko otoitza

Jainko gure Jauna,
gorputzeko ahuldadean guri eusteko egin dituzu ogi-ardoak;
egitzazu guretzat betiko biziaren sakramentu ere.
Jesu Kristo gure Jaunaren bitartez. *Rx*. Amen.

Jaunartze-ondorengo otoitza

Oi Jainko,
ogi eta kaliza berean guk parte hartzea nahi izan duzu;
egizu, Kristorekin gorputz berean bat eginik,
eman dezagula pozik betiko fruitu ugari
munduaren salbamenerako.
Jesu Kristo gure Jaunaren bitartez. *Rx*. Amen.

Otsailaren 15ean
URTEAN ZEHARREKO VI. IGANDEA

Agurra

Gure babes eta harkaitz dugun Jesus Jauna izan bedi zuekin.

Sarrerako oharpena

Gure fedea agerian jartzen dugu Bataiatuok igandean. Asteazkenean zehar bakoitzak bizi duena, Eukaristian elkarrekin partekatuz eta Kristoren Piztuera ospatuz.

Damu-otoitza

Aitor dezagun Jainkoaren aurrean, barkamen beharra dugula.

—Jesus Jauna, gure bidelagun egin zarena: erruki, Jauna.

—Jesus Jauna, gurutzean bizia eman diguzuna: Kristo, erruki.

—Jesus Jauna, piztean itxaropenez bete gaituzuna: erruki, Jauna.

Erruki dakigula Jainko guztiz ahaltsua, eta, gure bekatuak barkaturik, eraman gaitzala betiko bizira. *℟*. Amen.

Otoitza

Oi Jainko,
bihotz garbi eta zintzoengan biziko zarela agindu duzu;
zeure graziari esker,
egin gaitzazu zure bizileku izateko gai.
Zure Seme Jesu Kristo gure Jaunaren bitartez,
Zurekin eta Espiritu Santuarekin batean
Jainko eta Errege bizi baita gizaldi eta gizaldietan. *℟*. Amen.

Hitzaren liturgiari oharpena

Gizakiak begi aurrean ditu ona eta txarra aukeratzeko milaka aukera. Bizira daraman maitasun legeak argitzen gaitu horretan. Onbidera edo txar-bidera zuzentzeko erantzukizuna dugu. Dena Jainkoaren presentzian gertatzen da.

Lehenengo irakurgaia (*Sir* 15, 16-21)

Siraken liburutik

Nahi baduzu, gordeko dituzu aginduak, eta zintzo beteko Jaunaren nahia. Hark sua eta ura jarri dizkizu aurrean; nora nahi, hara eraman dezakezu eskua. Bizia eta heriotza daude gizakiaren aurrean jarriak; zer duen aukeratzeko, huraxe emango zaio. Handia da, bai, Jaunaren jakinduria, handia da haren ahalmena eta dena ikusten du. Begirune diotenengan ditu jarriak begiak, gizakiak egindako guztia ezagutzen du. Ez dio inori fedegabe izateko agindu, ezta inori bekatu egiteko baimenik eman ere.

Erantzun-salmoa (*Sal* 119 [118], 1-2. 4-5. 17-18. 33-34)



- ℣. Zorionekoak jokabide akats gabea **du**tenak,
Jaunaren lege-bidean **da**biltzanak.
Zorionekoak, haren manamendu**ak** betez,
haren bila bihotz-bihotzez **da**biltzanak. ℟.
- ℣. Jauna, legeak ezarri **di**tuzu,
arretaz gorde **di**tzagun.
Izan bitez sendo nire **bi**deak,
zure arauak **be**tetzeko. ℟.

- ℣. Egiozu on zeure zerbitzari honi;
biziko naiz eta gordeko dut zure hitza.
Ireki nire begiak, ikus ditzadan
zure legearen irakaspen harriarriak. ℟.
- ℣. Irakatsi niri, Jauna, zeure arauen bidea,
horri jarraitzea izango dut saria.
Emadazu ulermena, eta beteko dut zure legea,
bihotz-bihotzez dut gordeko. ℟.

Bigarren irakurgaia (1 Ko 2, 6-10)


San Paulo Apostoluak Korintoarrei egindako lehenengo gutunetik

Senideok: Jakinduria irakasten diegu guk kristau helduei; baina jakinduria hori ez da mundu honetakoa, ezta laster galduko diren mundu honetako agintariena ere. Guk Jainkoaren jakinduria misteriotsua irakasten dugu, hark ezkutuan edukia eta betidanik gure aintzarako erabakia zeukana. Mundu honetako agintarietako inork ez du ezagutu jakinduria hori, zeren, ezagutu izan balute, ez baitzuten gurutziltzatuko Jainkoaren aintza berekin zuen Jauna.

Baina, Liburu Santuak dioen bezala, «inork ikusi eta entzun ez duena, gizakiari inoiz bururatu ez zaiona, Jainkoak bera maite dutenentzat prestaturik zeukana», horixe agertu digu Jainkoak Espirituaren bidez. Espirituak, izan ere, guztia aztertzen du, baita Jainkoaren barren-barrena ere.

Aleluia (Ik. Mt 11, 25)





Homiliarako argibideak

- Jesusi ez die inongo graziazirik egiten eskribak euren bizitza legalismo huts bat bihurtu dutelako eta legeak sortu ziren espirituaren oinarria galdu dutelako.
- Giza mailan segurtasuna bila dabiltzan zenbaitek erlijioan aurkitzen dute euren babes eta aterpe, legalismoak euren segurtasun ezak konponduko dituelakoan. Arauak segurtasuna ematen diote zenbaiti. Erlijio maila, hare gehiago. Pentsatuz lege eta arauak Jainkoarengana hurbilduko gaituztelakoan, Jainko Aitaren borondatea betetzen dutela pentsatuz.
- Legalismo psikologiko, sozial edota erlijioso honek pertsonaren bihotz askea hondatu dezake.
- Jaunak aske nahi gaitu, gure giza gaitasunak zabalduz, pertsona guztien onerako, ona eginez eta ondo eginez gauzak, noski.

- Jesusen gaurko eskariak giza bizitzaren listaia igotzen du. Hauxe da eskatzen diguna: kontua ez da esan zigutena betetzea bakarrik. Horrexegatik argitzen du: *“nik, ordea, hau diozuet”*.

- Jesusen hiru adibide eskaini dizkigu gaurko ebanjelioan: bostgarren aginduak hiltzeko debekua dakargu. Baina, kontua ez da hurkoaren bizitza fisikoa zaintzea bakarrik, baizik bere izaera osoa.
- Bigarren adibidea adulterioa edo ezkontza-nahastea da. Zein erraz epaitu dezakegun maila honetan jakin gabe pertsonen bihotzetan zer ibili den. Beraz, beti errespetua.
- Hirugarrenik, juduek ohitura latza omen zuten edozer zela eta juramentua edo zin egiteko Jainkoaren aurrean. Jesusen jarraitzaileek zintzotasunez jokatzeko dute eta nahiko izango litzateke bai edo ez esatearekin Jainkoa tartean sartu gabe.
- Erlijioan legalismoa uxatzeko modua Jesusek iragartzen digun bidea jarraitzea da askatasunez, zintzotasunez eta egiaz.

2.- NAHI BADUZU

- Ebanjeliorik zailenetako bat aldarrikatu berri dugu, legalismo erlijiosoaren eta askatasun ebanjelikoaren arteko talka ezartzen duelako, antzinakoek esan zutenaren eta Jesusek askatasun eta exijentzia harrigarri aldarrikatzen duenaren artean.
- Aitortzen dut ez dudala ezagutu zorrotasun katolikoak oso modu nabarmenean estutzen zituen garaiak, pertsona fededun gutxi batzuen kontzientziak. Are gehiago, askok, beren erlijiotasun astunaren motxila hustu zutenean, ordura arte izan zuten fede-esperientzia kargatu zuten. Pena bat.
- Jesusen hain gogor eta hain garbi esandako hitzek orduko lege- maisu eta fariseuen jokabidea astindu bazuen, oraindik Jesu Kristoren Ebanjelio berbera hots egin beharrean aurkitzen gara bere esana zintzo jarraitu nahi badugu.

- Jesusek hitz hauek esan baino 200 urte lehenago Siraken liburuko idazleak gardentasun handienaz gonbidatu digu Jaunaren esana betetzea *“nahi baduzu, gordeko dituzu aginduak, eta zintzo beteko Jaunaren nahia”*.
- Aurrera egin dezakegu fede heldutasunean, Jesu Kristori jarraitzeko bidean leial eta aske. Hori bai, nahi baduzu.

Jainkoaren herriaren otoitza

Jo dezagun, senideok, errukiaren Jainkoarengana eta eska diezaiogun bere gogora bizitzeko indarra:

- Mundu guztiko bakearen alde, Elizen onaren alde eta gizakien batasunaren alde. Eska diezaiogun Jaunari.
- Herrietako arduradunen alde, beren ardurapean bizi oparoa eta bakezkoa izan dezagun. Eska diezaiogun Jaunari.
- Era askotara behartsu direnen alde, bereziki ongizatearen gizartean planeta zaintzen ez dugulako gosea jasaten dutenen alde. Eska diezaiogun Jaunari.
- Piztueraren itxaropenean hil diren gure senide eta adiskideen alde, Jainkoak bakezko atsedena eman diezaien. Eska diezaiogun Jaunari.

Jainko Jauna, zuk erakutsi diguzu, maitasunean duela Legeak bere oinarria eta betetasuna; entzun zure herriaren otoitzak eta emaguzu hemen bildu garenoi Ebanjelioko eskakizunekin leial izatea, gizaki guztientzat adiskidetze eta bake ezaugarri izan gaitezen. Jesu Kristo gure Jaunaren bitartez. ✠. Amen.

Oparigaien gaineko otoitza

Eskaintza honek, Jauna, garbi gaitzala eta eraberritu;
eta zure nahia betetzen dutenentzat
izan dadila betiko sariaren iturri.
Jesu Kristo gure Jaunaren bitartez. ✠. Amen.

Jaunartze-ondorengo otoitza

Jauna, zerutar ogi osasungarria eman diguzu janari;
egizu, bila ditzagula guk ere beti
egiazko bizia ematen diguten ondasunak.
Jesu Kristo gure Jaunaren bitartez. ✠. Amen.

